

Бақара сураси, 57-оят

09:05 / 05.09.2017 2911

Ва устингизга булатни соябон қилдик, сизга манн ва беданаларни туширдик. «Ризқ қилиб берган нарсаларимизнинг покларидан енглар». Бизга зулм қилмадилар. Лекин ўзларига зулм қилас эдилар. Бақара 57.

Ўша вақтда Бану Исройл қақроқ чўлда, қуёш қиздириб турган маконда яшар эдилар. Маълумки, ҳаво исиб, қуёш қиздириб берса, чўл жаҳаннамга айланиб кетади. Ана ўшандай ҳолатда Аллоҳ таоло Бану Исройлга Ўзининг навбатдаги неъматини ато қилди.

«Ва устингизга булатни соябон қилдик, сизга манн ва беданаларни туширдик. «Ризқ қилиб берган нарсаларимизнинг покларидан енглар».

Ривоятларда келишича, Аллоҳ таоло мазкур жазирама саҳрого бир булатни юборган экан. У келиб, Бану Исройлнинг бошига соя солиб турибди. Шу билан улар роҳат ва фароғатга эга бўлибдилар. Аллоҳ уларга таом ва шароб учун осмондан манн ва бедана туширибди. «Манн» нима экани тўғрисида тафсирчиларнинг таърифлари кўп.

Иbn Касийр раҳматуллоҳи алайҳининг айтишларича, «Манн шундай нарсаки, унинг ўзини еса, таом ва ширинлик бўлади, сувга қўшиб ичса, ичимлик бўлади. Бошқа нарсаларга қўшса ҳам бўлаверади».

Уларни туширгандан кейин Аллоҳ таоло уларга:

«Ризқ қилиб берган нарсаларимизнинг покларидан енглар», – деди. Гапнинг боришига қараганда, Бану Исройл бундай ҳолга ҳам шукр қилмаган кўринади. Шунинг учун ҳам Аллоҳ таоло оятнинг охирида:

«Бизга зулм қилмадилар. Лекин ўзларига зулм қилас эдилар», – демоқда.